

Pli pauc maridaglias, naschientschas e divorzis

Il Grischun surpasa per l'emprima giada il term da 200 000 persunas

MARTIN CABALZAR/FMR

■ **Malgrà ch'igl ha dà l'onn 2020 dapli mortoris e pli pauc naschientschas è la populaziun svizra creschida levamain per 0.7 pertschient. D'attribuir è quai al saldo da migraziuns.** La fin da 2020 dumbrava la Svizra 8 667 100 persunas, ni 61 100 persunas dapli che dal 2019. Il saldo da migraziun è cun in augment da radund 56 000 persunas bain anc adina positiv, dentant en cumparegliaziun cun 2019 è sa reducidas tant las immigraziuns sco las emigraziuns. Il dumber da las persunas immigradas è sa reduci per 3.9%, quel da las persunas emigradas schizunt per 16.6%. Quai resorta da la comunicaziun che l'Uffizi federal da statistica ha fatg dacurt. En il Grischun è la populaziun creschida 2020 per 1029 persunas sin 200 050 persunas.

Attaschadad a la patria

En quest connex tradescha la statistica ch'ìls Svizzers èn fitg attaschads a lur patria nativa. Entant ch'il dumber da burgais svizzers che èn returads en patria è creschì per 6.7% è l'immigraziun da persunas estras sa reduci per 3.9%. Cun in minus da 15.6% èn burgais svizzers er emigrads main savens che esters cun 14.9%. Tut en tut è la populaziun svizra dentant restada ils ultims trais onns detg stabila. La pandemia da corona para anzi d'avair augmentà supplementarmain l'attaschadad a la patria.

Dapli mortoris d'umens e seniors

«L'augment dals mortoris stat en stretg connex cun la pandemia da covid-19», constatescha l'Uffizi federal per statistica. L'onn 2020 hai numnadamain dà 76 000 mortoris en Svizra, quai èn 8 200 ni 12.1% dapli che l'onn precedent. Tar ils umens hai dà 14.6% dapli mortoris, tar las dunnas 9.9%. Marcants è l'augment da mortoris tar persunas sur 65 onns

(+12.7%). Tar la generaziun da 0 fin 64 onns è quest dumber bain er creschì, dentant «mo» per 8.2%. Sulet en il chantun Sutsilvania è il dumber da mortoris tschessà 2020. Las aspectativas da vita èn sa reducidas en la media tar ils umens da 81.9 sin 81.1 e tar las dunna da 85.6 sin 85.2 onns.

Pli pauc naschientschas

Las consequenzas pussaivlas da la pandemia sin las naschientschas pon ins eruir definitivamain pir en il decurs dals emprims mais da 2021. Evident è dentant ch'il dumber da naschientschas è sa reduci 2020 da 86 200 sin 85 500 (-0.8%). 72.4% da las naschientschas èn succedidas entaifer ina lètg, 27.6% ordaifer. Tenor la cifras provisorias ha la media da naschientschas per dunna muntà 2020 ad 1.46 uffants. In augment da las naschientschas han registrà ils suandonts chantuns: Solothurn, Sutsilvania, Schaffusa, Vallais, Sviz e Sursilvania (dapli che 2%), S. Gagl (dapli che 1%) ed il Grischun cun 0.2%. En 9 chantuns, tranter quels era il Grischun, hai dà 2020 dapli mortoris che naschientschas. Cun quai è il saldo da naschientschas crudà en Svizra sin il pli bass nivel dapi 2004.

Damain maridaglias e divorzis

Per 2020 è tant il dumber da las maridaglias sco quel dals divorzis sa reduci en cumparegliaziun cun l'onn precedent. L'onn passà hai dà 34 900 maridaglias, 10.4% pli pauc che 2019. Sulet en il Grischun (+ 2%) ed en Sutsilvania (+1.6%) hai dà 2020 dapli matrimonis. En il medem mument han ins registrà en Svizra 16 100 divorzis, qua èn 4.7% pli pauc che 2019. En media han las lètgts divorziadas durà 15.6 onns. Las tendenzas dals ultims onns laschan presumar che duas da tschintg lètgts (39.2%) fineschan baud ni tard en in divorzi, concluda l'Uffizi federal da statistica.